

He Whiore

nā Heni Turner rāua ko Julie Ellis


Atakura

He Whakatau

Me mātua pānui kia mārāma rawa koe ki ngā whārangi 8–14 o tēnei pukapuka.

He whakarāpopoto

Pānuihia te whakarāpopoto ki te ākonga. He whiore tō ia kararehe. He aha te āhua? Pānuihia te pukapuka *He Whiore* kia kite i ngā momo whiore.



He kupu whakataki

Kia kaha ki te whakamahi i ngā wheako me ngā mōhio o ngā ākonga. Kia hāngai tonu te whakatenatena ki te whakauru i ngā ākonga katoa. Me whakatitina rawa te pūkenga tiro whakamua. Matapakihia ngā kupu hou me te āta whakamahi i te papa kupu, whakairo kupu rānei me ngā whakaahua kei te uhi. Me whakamaumahara hoki te ākonga ki te pātai i a ia anō i te wā e pānui ana ia mai i te tīmatanga ki te mutunga o te pānui.

He whiore tō ētahi momo kararehe, kāore he whiore o ētahi atu momo kararehe. He aha i pēnei ai?

He aha i pērā ai te nui o ngā momo whiore rerekē o ngā kararehe? Kōrerorerotia te rerekētanga o te rahi, te roa, te tae, te aha, te aha.

Matapakia ētahi whiore kararehe rerekē i kitea e te ākonga.

He Matapaki

Tirohia te pai o te pānui a te ākonga

I te wā o te matapaki, me pānui te ākonga i te katoa, i tētahi wāhanga noa iho rānei, o te pukapuka ki a koe. Kātahi ka:

- whakanui, āta tatari, whakahau tika;
- titiro mēnā e tika ana, e pai ana hoki (mā te tataui i ngā hē), te rere o te reo;
- titiro mēnā e mārāma ana, mā te whai i tētahi o ngā huarahi e whai ake nei;
 - te pātai i ngā whakapuaki māramatanga me ētahi e tika ana, ā, whakaritea kia kōrero anō te ākonga i tētahi wāhanga o te pakiwaitara ki āna kupu ake;
 - te pātai mō tētahi āhuratanga o te pakiwaitara, arā, te kaupapa, te ritenga, ngā ariā matua, te raupapatanga, ngā kiripuaki;
 - te whakatenatena i te ākonga ki te titiro ki mua, ki te matapae hoki, i te wā o te whakataki.

Whakaarohia he aha atu hei mahi mā te ākonga

Me whakahau te ākonga:

- ki te whakamahi anō i te pukapuka i te taha o te mihini ripene kōrero, i tōna kotahi rānei;

- ki te whakaoti i tētahi o ngā hei mahi e pā ana ki te pukapuka;
- ki te whakaharatau kia eke te ākonga ki tētahi atu taumata.

He whakapuaki māramatanga

1. Ko te aha te kaupapa o te pukapuka?
2. He aha ngā kararehe i roto i te pukapuka?
3. He aha ngā āhua o ngā momo whiore rerekē?
4. Ki ōu whakaaro, he aha ētahi o ngā whiore i poto ai, ētahi atu i roa ai?
5. Ko tēhea te whiore pai ki a koe? Nā te aha?

Ngā whakautu ki ngā whakapuaki māramatanga

1. Ko ngā momo whiore o ētahi kararehe.
2. He kōre, he rāpeti, he makimaki, he pānara whero, he taika, he hipohipo, he arewhana.
3. He tūpuhi, he kerehunga, he roa, he pōruru, he tāhei, he poto, he iti.
4. Ka rerekē ngā whakautu.
5. Ka rerekē ngā whakautu.

He Mahere – Hei Tautoko i te Reo

E whai ake nei ētahi huarahi hei mahinga ngātahi mā ngā ākonga. Tirohia ngā whārangi kei te Tirohanga Whānui mō ngā tino āhuratanga o te pukapuka nei.

Te pūtaka

I He rapu mōhio mai i te pukapuka.

He whakatakinga ā-roto, he whakaharatau

I mua i te pānui i te pukapuka, whiwhiria ngā take kua whai whiore te kararehe, me ngā take i pērā ai te nui o ngā momo rerekē, ngā āhua rerekē me ngā rahi rerekē.

Kia oti i te ākonga te pukapuka te pānui, kōrerorerotia ngā momo whiore rerekē i roto i te pukapuka. Matapakia ngā take i pērā ai te āhua o te whiore o tēnā momo kararehe, o tēnā momo kararehe.

E pai ana ki te ākonga te whai whiore? He aha ai, he aha rānei i kore ai? Ki te whai whiore te ākonga, he aha te momo pai ki a ia. He aha ai?

Tirohia ngā rerekētanga o ngā whiore (o ngā ngote ū), ngā hiku (o ngā ika), ngā hikumārō (o ngā manu) me ngā taharapa (o te tuna). He aha i pērā ai ngā rerekētanga?